

Uunga siunnersuut:**Aatsitassat pillugit ingerlatallu tamatumunnga pingaarutillit pillugit inatsisartut inatsisaata (aatsitassanut ikummatissanullu inatsit) allangortinneqarnissaa pillugu****Inatsisartut inatsisaat**

(Najukkani aatsitassanut tunngasunik suliaqarneq pillugu Inatsisartut inatsisaata akuerineqarnerata aammalu upalungaarsimanermut ataatsimiititaliarsuaq pillugu aalajangersakkat atorunnaarsinneqarnerisa malitsigisaannik sunniutaasumik allangortitsinerit)

§ 1

Aatsitassat pillugit ingerlatallu tamatumunnga pingaarutillit pillugit inatsisartut inatsisaanni nr. 7, 7. december 2009-meersumi (aatsitassanut ikummatissanullu inatsit), takuuk Namminersorlutik Oqartussat inatsimmut nalunaarutaat nr. 8, 26. februar 2020-meersoq, Inatsisartut inatsisaanni nr. 27, 13. juni 2023-meersumi allangortinneqartoq, makku allangortinneqarput:

1. § 14 a kingorna kapitali 3-mi ilanngunneqarpoq:

”Pissutsit najukkani aatsitassanut tunngasunik suliaqarneq pillugu Inatsisartut inatsisaanni pineqartunut ilaasut

§ 14 b. Inatsisartut inatsisaat pissutsinut, ilanngullugit ingerlatassat akuersissutillu, najukkani aatsitassanut tunngasunik suliaqarneq pillugu Inatsisartut inatsisaanni pineqartunut ilaasunut, atuutinngilaq.”

2. § 2, imm. 2, imatut oqaasertalerneqarpoq:

” *Imm. 2.* Ingerlatassat makkua akuersissut Naalakkersuisunit Inatsisartut inatsisaanni maleruagassat malillugit tunniunneqartoq naaportorlugu taamaallaat ingerlanneqaqqusaapput, taamaattoq takukkit §§ 45-45 b:

1) Kalaallit Nunaanni aatsitassanik misissueqqaarneq, aatsitassarsiorluni misissuineq aamma aatsitassanik piiiaaneq kiisalu Kalaallit Nunaanniit aatsitassanik annissuineq.

2) Nunap iluata toqqorsivittut imaluunniit aatsitassanut tunngasunik suliaqarneq pillugu siunertanut atorneqarnera.

3) Imermeersumik, anorimeersumik imaluunniit nunap iluaneersumik nukissiamik ingerlatassanut Inatsisartut inatsisaanni pineqartunut ilaasunut atuneq.

4) Ruujorinik aqqusersuutinik ingerlatassanut Inatsisartut inatsisaanni pineqartunut ilaasunut atugassanik pilersitsineq ingerlatsinerlu.”

3. § 3 c, imm. 5, imatut oqaasertalerneqarpoq:

” *Imm. 5.* Misissueqqaarnissamut akuersissut pillugu aalajangiinerit, takuuk kapitali 4, aalajangiinerit inuiaqatigiinnut imaluunniit avatangiisinut annertuumik sunniuteqarsinnaasussaangippata, takuuk imm. 3, Aatsitassanut Aqutsisoqarfimmit imaluunniit Avatangiisinut Aqutsisoqarfimmit aalajangiiffigineqassapput.”

4. § 16, imm. 3 imatut oqaasertalerneqarpoq:

” *Imm. 3.* Imm. 1 malillugu paaanissamut akuersissut taamaallaat aktiaatileqatigiiffimmut tunniunneqarsinnaavoq. Ingerlatseqatigiiffik taamaallaat Inatsisartut inatsisaat manna naapertorlugu akuersissutit malillugit suliaqarnermik ingerlatseqqusaavoq aammalu pinngitsaaliissummik ataatsimoorluni akileraaruserneqassaaq pineqarsimanngippat, ingerlatseqatigiiffiit allat peqatigalugit ataatsimoorluni akileraaruserneqassaaq. Ingerlatseqatigiiffik pingaarnertut maleruagassatut Kalaallit Nunaanni angerlarsimaffeqassaaq. Ingerlatseqatigiiffik suliffissuarmut ingerlatseqatigiiffiup ilaaffigisaanit annikinnerusumik aningaasannortitseqqusaanngilaq, taamaattoq ingerlatseqatigiiffiup aningaasaatai avataaneersut tamatigut 2:1 tikillugu naleqqersuutigalugu nammineq aningaasaataannit annertunerusinnaapput. Ingerlatseqatigiiffik ataatsimut isigalugu akigititanut naalakkersuinermit attuumassuteqanngitsunut aammalu atugassarititaasut naalakkersuinermit attuumassuteqanngitsut tunngavigalugit niuersinnaavoq. Pisinnaatitsissummik pigisaqartoq paaanermik suliaqarnermut pineqartunut pisariaqartumik suliassamut paasisimasaqassaaq aningaasaqarnikkullu tunuliaquteqassalluni.”

5. Kapitalit 8 atorunnaarsinneqarpoq.

6. § 45 imatut oqaasertalerneqarpoq:

” **§ 45.** Inuk qaammatini siuliini 60-ni Kalaallit Nunaanni aalajangersimasumik najugaqareersimasooq aammalu Kalaallit Nunaannut tamakkiisumik akileraartussaataasimasooq, tamatumunnga akuersissummik piunarsaateqarfiunngitsumik sumiiffimmi aatsitassanut aatsitassarsiorluni misissuinissamut kisermaassisussaataalluni akuersissummi nalinginnaasumi pineqartunut ilaasumi, inuussutissarsiuutigalugu aatsitassanik kaanngaqqallutik nunamiittunik katersisinnaavoq.

Imm. 2. Inuk qaammatini siuliini 60-ni Kalaallit Nunaanni aalajangersimasumik najugaqareersimasooq aammalu Kalaallit Nunaannut tamakkiisumik akileraartussaataasimasooq, inuup akuersissummut pisinnaatitsissummik pigisaqartumut tamanna pillugu allaganngorlugu isumaqatigiissuteqarluni uppersarsinnaaguniuk, sumiiffimmi aatsitassanik aatsitassarsiorluni misissuinissamut kisermaassisussaataalluni akuersissummi nalinginnaasumi pineqartunut ilaasumi atortut tigummiannartakkat atorlugit aatsitassanik inuussutissarsiuutigalugu katersisinnaavoq paaasinnaallunilu, kiisalu takornarianut il.il. aatsitassat aamma nunap sannaa takutinniarlugit ilitersuisoqarluni angalaartitsinernik ingerlatsisinnaalluni.

Imm. 3. Inuup Kalaallit Nunaannut atassuteqarnera aallaavigalugu tamanna naleqquttutut nalilerneqarpat, aammalu inuk ilinniarnermik assigisaanilluunniit pissuteqartumik Kalaallit

Nunaata avataaniissimappat, imm. 1-2 malillugit qaammatinik 60-nik piunasaqaateqarnerup saneqqunneqarnissaanik Naalakkersuisut immikkut ittumik akuersissuteqarsinnaapput.

Imm. 4. Naalakkersuisut pissutsit imm. 1-3-mi taaneqartut pillugit aalajangersakkanik erseqqinnerusunik aalajangersaasinnaapput.”

7. § 45 a. imatut oqaasertalerneqarpoq:

” **§ 45 a.** Inuk Kalaallit Nunaanni aalajangersimasumik najugaqanngitsoq, takuuk § 45, imm. 1, ilitersuisoqarluni angalaarnermut § 45, imm. 2-mi taaneqartumut atatillugu katersineq imaluunniit piianeq ingerlanneqarsimanngippat, sumiiffimmi aatsitassanik aatsitassarsiorluni misissuinissamut kisermaassisussaataitaalluni akuersissummi nalinginnaasumi pineqartunut ilaasumi aatsitassanik katerseqqusaanngilaq imaluunniit piiaaqusaanani.”

8. § 45 b. imatut oqaasertalerneqarpoq:

” **§ 45 b.** §§ 45 aamma 45 a malillugit aatsitassanik katersisinnaanermi piiasinnaanermilu aammalu Kalaallit Nunaanniit annessisinnaanermi aatsitassat qinngornernik ulorianartunik akullit ilaatinneqanngillat.”

9. §§ 45 c. - 48 atorunnaarsinneqarput.

10. § 73, imm. 1, imatut oqaasertalerneqarpoq:

” Ingerlatassat makkua ilaannut ataatsimut akuersissut aammalu akuersissuteqarneq ingerlatassap suliarineqarnerani avatangiisinut sunniutaasussanik nalilersuineq (VVM) ingerlanneqareerpat, tamatumunngalu nassuiaat (VVM-imut nassuiaat) Naalakkersuisunit akuerineqareerpat aatsaat tunniunneqarsinnaavoq:

1) Ikummatissiassanik qalluineq.

2) Nunap iluata toqqorsivittut imaluunniit aatsitassarsiorluni ingerlatassat pillugit siunertanut atorneqarnera.

3) Ingerlatassanut Inatsisartut inatsisaanni matumani pineqartunut ilaasunut anorimit imaluunniit nunap iluanit nukissiamik atuineq.

4) Sanaartukkanik ingerlatassani Inatsisartut inatsisaanni matumani pineqartunut ilaasuni atorneqartunik annertunerusunik pilersitsineq imaluunniit inissiineq atuinerlu, ilanngullugit sinerissap avataani suliaqarfiit aalaakkaasut, sinerissap avataani suliaqarfiit nuunneqarsinnaasut, umiarsuit unnuisarfiusussat, aatsitassarsiorfiit, nunap iluani suliaqarfiit, nukissiuuteqarfiit taakkununnga atasut aamma ruujorit aqqusersuutit taakkununnga atasut.

5) Ingerlatamik imaluunniit suliaqarfimmik ingerlatsinerup ilaalu ilanngullugit nr. 1-4-mi taaneqartup unitsinneqarnera imaluunniit piiarneqarnera (peerneqarnera) imaluunniit suliaqarfimmik nr. 4-mi taaneqartumik matusineq.”

11. § 80 atorunnaarsinneqarpoq, aammalu § 79 kingorna immikkoortup qulequtaa imatut oqaasertalerneqarpoq:

”Ajutoortoqartillugu kommissioni”

12. § 82 imatut oqaasertalerneqarpoq:

” § 82. Kinaluunniit Inatsisartut inatsisaat manna malillugu pisussaaffilerneqarsimasoq, qinnuigineqarnermigut Naalakkersuisut aamma Ajutoortoqartillugu Kommissioni paasissutissanik, taakku kapitali manna malillugu suliaminnik ingerlatsinissaminnik pisariaqartutut isigisaannik, tunissavai. Tamanna aamma inunnut, Inatsisartut inatsisaat malillugu pisussaaffilerneqarsimasut sinnerlugit iliuuseqartunut atuuppoq.

Imm. 2. Kinaluunniit Inatsisartut inatsisaat manna malillugu pisussaaffilerneqarsimasoq Naalakkersuisut aamma Ajutoortoqartillugu Kommissionip kapitali manna malillugu misissuinerini pisariaqartunik tamaginnik ikiussallugit pisussaavoq.”

13. § 87, imm. 2 imatut oqaasertalerneqarpoq:

” *Imm. 2.* Taamaattoq sumiiffiup akuersissuteqarfiusup iluani avataanilu illunut sanaartukkanullu nunaminertamik atugassinneqarnissaq pillugu piunasaqaatinik naammassinninnissaq, Inatsisartut inatsisaat manna malillugu akuersissummi piunasaqaatigineqanngilaq. Inatsisartut inatsisaat manna malillugu akuersissut taamatuttaaq ingerlatassanik akuersissummi pineqartunut ilaasunik kiisalu ingerlatassanik allanik tamatumunnga atasunik suliaqarnissamut pisinnaatitaaffiliivoq.”

14. § 96, imm. 2, imatut oqaasertalerneqarpoq:

” *Imm. 2.* Akiligassinneqarluni pineqaatissinneqarsinnaavoq, piaaraluni imaluunniit mianersuaalliorujussuarluni:

1) Paasissutissanik, Inatsisartut inatsisaat manna naapertorlugu imaluunniit aalajangersakkat imaluunniit atugassarititaasut Inatsisartut inatsisaat manna naapertorlugu aalajangersagaasut naapertorlugit pisortat piunasaqaatigisaannik, eqqunngitsunik imaluunniit salloqittaataasunik tunniussisoq imaluunniit paasissutissanik nipangiussiinnarteq.

2) §§ 45-mik, 45a-mik imaluunniit 45b-mik unioqquutitsisumik aatsitassanik katersisoq imaluunniit piiaasoq.

3) Akuersissummut imaluunniit akuersissuteqarnermut Inatsisartut inatsisaat manna malillugu imaluunniit aalajangersakkat Inatsisartut inatsisaat manna naapertorlugu aalajangersarneqartut malillugit tunniunneqartumut atugassarititaasunik unioqquutitsisoq.

4) Peqqusissuteqarnermik Inatsisartut inatsisaat manna imaluunniit aalajangersakkat Inatsisartut inatsisaat manna naapertorlugu aalajangersarneqartut malillugit tunniunneqartumik malinninngitsaq.”

15. § 97, imm. 1 imatut oqaasertalerneqarpoq:

” Naalakkersuisut aatsitassat § 2, imm. 2, nr. 1, imaluunniit §§ 45-45b unioqquutillugit imaluunniit atugassarititaasut akuersissummi imaluunniit akuersissuteqarnermi imaluunniit aalajangersakkani Inatsisartut inatsisaat naapertorlugu aalajangersagaasuni

aalajangersarneqartut unioqqutillugit, akuersissummik peqarani katersorneqartut, piarneqartut imaluunniit atorneqartut arsaarinnissutigisinnaavaat.”

§ 2

Inatsisartut inatsisaat manna ulloq 1. juli 2024 atuutilerpoq.

Namminersorlutik Oqartussat, ulloq xx. xxx 2024

Naalakkersuisut Siulittaasuat